



大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之四十一

咸豐元年辛亥閏八月甲申朔諭內閣陸建瀛等奏參修守  
不慎以致河隄漫塌之道廳營員請分別革職摘頂勒限賠  
修一摺據奏八月初一二等日西北風暴大作江運廳屬甘  
泉縣境牯河內之撐隄搶禦不及致漫溢潰塌二十餘丈民  
埝十餘丈前江運廳丁憂同知彭以竺於修築大隄未能一  
律如式偶遇風暴即節節危險以致接任之員會營搶護無  
暇顧及牯河實屬咎無可逭彭以竺著即革職接署江運廳  
同知朱忻江防營守備蔡覲賢於彭以竺修築不能如式及

有無庫項未清。並未即日通稟。該管常鎮通海道姚熊飛。於彭以竺經手工程錢糧。未能覈實辦理。均有應得之咎。朱忻。蔡觀賢。著一併革職。暫行留任。姚熊飛。著摘去頂帶。勒限賠修。如逾限不完。即將該廳營嚴叅治罪。○又諭御史吳廷溥。奏請查辦偷漏稅課等語。據稱崇文門稅課。以茶酒為大宗。茶販半從穆家峪等處繞越出口。漏稅日多。酒稅一項。例不准由外局報稅。近來奸民販私包私。串通崇文門差役海巡人等。設立私局。包攬偷漏。以致稅銀減少。必當嚴懲弊端。力加整頓。著步軍統領衙門。順天府五城。按照該御史所指各情。並各處著名販私匪犯。嚴行查辦。務期仍遵舊例。不得繞

越偷漏。以重課稅。而除積蠹。○諭軍機大臣等。陸建瀛等奏。士民呈請嚴禁天主教。批准立案嘉獎。並酌擬章程數條。開單呈覽。該督等辦理此事。甚屬妥協。惟與外夷交涉事件。自應循守舊章。以杜曉瀆。尤須隨時應機通變。期於制馭得宜。若將此時所擬章程。知照該夷。設該夷亦另有所求。將何以應之。即如單內第二條。免其查禁等句。意在申明條約。轉覺語涉痕迹。俾習教者恃有明文。益無忌憚。總之原約所有者。無庸再為申說。其非原約所有。須因時酌量者。在當日定約之初。即已意在言表。全在各該地方官。權宜操縱。不必分列條款。豫定成規。更無須事事照會。致該夷反滋辯論。事無了

期該督等即將擬辦事宜咨行內地飭屬自行辦理並將該省現辦情形咨會廣東毋庸將此章程給與夷人照會凡事慎之於始勿自我發端轉啟將來饒舌也將此諭令知之○盛京將軍奕興等奏稽查東邊外山場與朝鮮官會哨情形得旨雖屬照例巡查亦應認真不可視為具文因循廢墮天下之通病慎戒之○改鑄浙江仁和縣知縣印信從巡撫常大溥請也○撫恤琉球國遭風難夷如例○乙酉諭軍機大臣等據載茂慶錫奏遵查前後藏喇嘛呈進貢物從前辦理情形一摺此次前後藏達賴喇嘛等恭進佛座畫像著永康等暫於永福寺供奉俟

孝和睿皇后

宣宗成皇帝梓宮奉安時再行酌定供奉處所所有呈進貢物除奏書哈達業經焚化外其餘藏香紅花璣璣等貢物著於月祭時分別敬謹焚化將此諭令知之○山東巡撫陳慶偕奏行抵登郡現辦洋盜情形得旨盜首務期必獲飭令鎮將等認真勦捕勿稍推諉陳世忠人樸誠尚屬有用之材妥馭之○免四川出征兵丁未完行裝銀○丙戌

上詣

壽康宮問

皇貴太妃安○諭內閣河南南召縣地方現在緝捕緊要著該

撫於現任知縣內揀選人地相宜之員調補。新選南召縣知縣修際熙著歸部另選。○又諭薩迎阿奏審擬已革蒙古章京格窩一案。並請將前鋒翼長佐領富克津泰等飭回伊犁當差等語。富克津泰等著暫留甘肅聽候諭旨。所請量予鼓勵之處著俟番案會審完結後聲明請旨。○署陝甘總督薩迎阿奏甘肅皋蘭等九州縣被旱被雹被水情形得旨。被災較重之區勘明迅速具奏不准耽延。○頒賞王大臣暨內廷翰林各省督撫石刻。

御製御門聽政述志示在廷諸臣詩各一分。○丁亥諭內閣楊以增奏趕辦民堰漫水工程請飭河員分賠歸款等語。江運

廳撐隄民堰。經該河督親往督辦。計八月內業已竣工。所用銀兩准其先由河庫墊發。仍著前同知彭以筭及署同知朱忻署守備蔡觀賢等分賠歸款。○又諭楊以增奏豐北廳屬隄身坐墊現在趕辦情形一摺。據稱本年黃河水勢自白露節後逐日加長。八月二十日寅時風雨交作。河水高過隄頂。豐下汎三堡迤上無工處所。先已漫水。旋致隄身坐墊。刷寬至四五十丈。現經該河督馳抵該處。先飭查明被水村莊妥為撫恤。並查照嘉慶元年豐北六堡漫水成案辦理。著陸建瀛楊以增嚴督廳汎各員。將現在漫口趕緊盤裹。應辦各工。迅即興築。儻搶護遲延。致漫口刷寬愈甚。回空漕船。或有貽

誤。惟該河督等是問。並著查明此次整隄。是否實係無工處。所毋得藉詞掩飾。其疏防之該管文武各員。著即嚴行參奏。○又諭。前因御史張廷瑞奏。請酌改新疆換防兵丁。並侍郎恆春奏。請一體改為眷兵各摺。均交伊犁將軍。會同陝甘總督等。妥議具奏。茲據奕山。薩迎阿等。通盤籌畫。臚列各條。具奏。所陳車輛之糜費浩繁。鹽菜之有增無減。以及添置鍋帳。房屋展寬。各城添設官員。耗費糧食。已屬諸多窒礙。且回疆各城。向無內地婦女。如改防兵為眷兵。紛紛遷駐。更易滋生事端。計各城遷改眷兵費用。先須籌墊銀二百四五十萬兩。迨三十餘年後。每年始能節省銀六萬兩。是所省尚在異日。

而所費已在目前。自無須輕議更張。轉滋流弊。所有該處換防兵丁。均著仍照舊章辦理。並著該將軍等。行知各城大臣。認真操練。如有庸懦將弁。及老弱兵丁。務須隨時甄別。裁汰。以重邊防。將此諭知奕山。薩迎阿。並諭布彥奉。毓書。德齡。知之。○戊子。諭軍機大臣等。賽尚阿奏。連日進攻賊匪。疊獲勝仗一摺。此次雖連日獲勝。究未大加懲創。現據訊供。該匪有由石嘴渡江南竄之信。自應分派兵勇。嚴密堵禦。惟該匪詭譎異常。難保不為聲東擊西之計。其東北鵬化一路。經該大臣激勵該處紳士。及山內犒勇。均已志切同仇。並經烏蘭泰派撥兵勇。前往接應。布置已極周密。儻該匪窮蹙竄出。必能

會合兜揜。又據片奏。探得新墟賊匪紛紛扒越後路高嶺逃竄。現經兵勇衝殺圍攻等語。該匪股數眾多。恐其分作數路牽制我師。尤當防其詭計。現在賊首韋正、楊秀青、馮雲山等均在圍中。必須設法誘揜。勿令竄逸。更致勾結。至該匪在墟外加築土牆。並於地上盤旋。難保不別蓄詐謀。不可不防。砍斃黃鬚賊目。究係何人。著即確查具奏。提督重綸。忽得痠疾。著該大臣察看。如未能速愈。或愈後尚難回任。即奏請開缺。另行簡放。重綸所帶之兵。雖已交惠慶管帶。而貴州提督亦甚緊要。未可耽延。至兵貴神速。當此乘勝之時。正可一鼓作氣。掃蕩賊氛。固不可急遽貪功。亦不可遷延誤事。想該大臣

必能洞悉機宜。上孚朕意也。勉之望之。將此由六百里諭令知之。○又諭程喬采奏粵東股匪竄撲宜章縣境一摺。粵東餘匪僅數百人。何以一入楚境。遂致搶卡戕官。可見該省疊次奏稱嚴密防範。盡屬虛詞。現在該匪竄聚乳源交界之客家洞地方。業經該鎮道選帶兵勇前往。著該督等嚴飭堵勦。仍咨會廣東文武一體勦捕。斷不可互相推諉。致令蔓延。生擒賊婦王蕭氏等著嚴行審訊。按律懲辦。所供沙包會收徒一百餘人。是否與湖南會匪暗相勾結。其同夥之廣東匪徒楊得魁、劉上元等。如訊有窩聚地方。即飛咨廣東督撫查拏。務期全數弋獲。至被賊衝散。不知下落之守備趙鴻賓。著查

明隨時奏聞。將此由五百里諭令知之。○又諭程喬采奏廣東陽山縣匪徒數百人。竄撲宜章之思仁坳卡。守備趙鴻賓等受傷。署千總張凌雲把總杜瑞被害。該匪屯聚莽山糍粑嶺一帶。續經宜章縣營帶兵往勦。轟斃賊匪十餘名。生擒頭目賊婦王蕭氏。餘匪又竄聚乳源交界之容家洞地方。現已飛飭永州鎮總兵孫應照。衡永郴桂道張其仁馳往勦辦。並咨廣東會勦等語。湖南宜章縣界連廣東連州陽山乳源等處。匪徒竄入滋擾。戕害弁兵。負嵎屯聚。亟宜痛加勦洗。著徐廣縉葉名琛即飭將弁帶兵馳赴該處。合力兜捕。掃數殲除。勿留餘孽。至王蕭氏一犯。訊供起會收徒。與廣東之楊得魁。

劉上元等同夥。著該督等遴派妥員。將該犯等嚴密訪拏。務獲懲辦。其沙包會係何邪教。王蕭氏所收之徒。一百四十人。現在何處遊奕。此外入會之人。尚有若干。均著嚴查究辦。毋得稍有不實不盡。原摺鈔給閱看。將此由五百里諭令知之。○湖廣總督程喬采奏前獲匪犯陳先得等。供詞虛捏。得旨仍應嚴密防範。勿致本境另起股匪。○以攻勦廣西新墟賊匪獲勝。賞副都統烏蘭泰。都統銜。二等侍衛開隆阿。頭等侍衛。○以湖南宜章縣疏防鄰匪竄入縣境。參將積拉明阿。知縣鄒颺廷。下部議處。予陣亡千總張凌雲。把總杜瑞。祭葬世職。○予父子殉節廣西巡檢馮元吉。祭葬世職。並於任所本

籍各建專祠。子澍溥附祀。○己丑。

上詣

壽康宮問

皇貴太妃安。○諭內閣奕湘徐澤醇奏請將妄稟之勒休知縣革職一摺。四川勒休知縣閻有倫牽稟降調糧員武來雨一案。前經降旨交奕湘會同徐澤醇審訊。茲據該將軍等審明閻有倫所稟各情。並無實據。仍復堅執其說。巧為避就。居心實屬險詐。閻有倫著即革職。以示懲儆。武來雨查無捏造蒙蔽等情。著毋庸議。○又諭卓秉恬等遵旨查明直隸京官與貢監生互稟一案。又王慶雲奏覆試屆期請豫禁爭端各一

摺。並請復還改籍舊制等語。考試用京官印結。原以識認稽察為重。近來直隸京官專舉十二人出結。其勢不能周知。無怪該貢監等紛紛聚訟。目為把持。嗣後考試出結。自應查覈舊例。以息爭端。所有卓秉恬等議覆一摺。並王慶雲陳奏事宜。均著禮部速議具奏。其覆試後改歸原籍新章。與舊例孰為妥協。亦著一併詳議具奏。○庚寅。諭內閣徐廣縉等奏。勦辦凌十八股匪情形一摺。賊匪凌十八自移竄廣東羅定州羅鏡地方。經該督調兵籌勦。茲據奏各隊兵勇均至分界劄營。三路進攻。先經小捷。繼獲大勝。護參將衛佐邦管帶兵勇現已趕至羅定。正可奮勇攻勦。一鼓成擒。將首匪凌十八並

夥黨悉數殲除。勿令乘間免脫。其何名科等股。並著該督分飭鎮將。速行勦捕。將高廉一帶各匪掃除後。即可移兵與廣西會勦。共奏膚功也。所有陣亡之黃岡左營把總蕭振聲。提標外委駱雄超。並陣亡兵勇。著查明一併咨部議卹。○又諭。前據琦善保奏。勦辦番回出力各員。曾經降旨交薩迎阿查覈。茲據覆稱。琦善前次攻勦番回。伊未曾目覩。所保人數較多。不能查出何員出力。措詞已屬含混。又稱容侯留心考察。另請鼓勵。是於勦辦番案之外。復開冒濫保舉之端。尤屬錯謬。薩迎阿著傳旨申飭。○又諭。御史吳若準奏請嚴禁差役積弊一摺。各省州縣。設有胥役。原為辦公差遣之用。而蠹役

即因之舞弊。假公濟私。大為民害。如該御史所稱。假催科為名。擾及保甲。復假辦差為名。科斂錢文。至緝捕不力。拳盜分贓。及遇地方失事。誣扳良民。任意需索。似此種種積弊。若不嚴行申禁。何以靖閭閻。而肅吏治。著各直省督撫。嚴飭地方官。隨時查察。儻有前項各弊。立即嚴行懲辦。如州縣袒庇。故縱。著即從嚴叅處。至直隸河南等省白役。一州一縣。何至盈千累百之多。若如所奏。其擾害地方。不問可知。並著該督撫。嚴查禁革。毋稍徇隱。○又諭。御史張澧翰奏。河工道缺職掌。今昔情形不同。請分別歸併改隸。以專責成一摺。另片奏。南河錢糧事宜。請照東河之例。分交各道庫收放。並將河庫道

改為題調缺等語。著陸建瀛會同楊以增悉心體察。妥議具奏。尋奏。南河庫道一缺。因係清黃交匯之處。時有要工。未便照東河例。將錢糧分儲各道。惟察看情形。本有改併之議。擬於每年額費三百萬兩內。提銀數十萬兩。專儲河督衙門。遇有急工。隨時奏明酌提。得旨。妥議章程。必期可垂永久。○以理藩院尚書吉倫泰兼署兵部尚書。○辛卯。豁免福建省道光二十九年以前。竈地未完額課。○撫恤日本國遭風難夷如例。○壬辰。

上詣

壽康宮問

皇貴太妃安。○以協辦大學士戶部尚書裕誠為滿洲繙譯鄉試正考官。通政司參議倭什琿布為副考官。○癸巳。諭內閣。富隆阿於交卸英吉沙爾領隊大臣事務。常清於接受署任。俱用漢字摺奏。殊屬非是。著傳旨申飭。○甲午。諭內閣。楊以增奏。馳抵豐北三堡。勘得口門。續經塌寬。至一百八十五丈。水深三四丈不等。現在大溜全行掣動。迤下正河。業已斷流。被淹地方居民。罹此凶災。流離失所。朕心實深憫惻。著該督撫等。迅速籌款。派員妥為撫恤。毋令一夫失所。河流現已分作兩股。所擬啟放各壩。並勘估各工。均著趕緊籌辦。仍嚴飭道將等。將東西盤裹壩頭。竭力保護。儻再有疏虞。或致貽誤。

漕船回空。該河督等自問當得何罪耶。所有專管廳汛疏防失事之豐北廳通判王熙善。豐北營守備郝瀛東。著即行革職。枷號河干示眾。豐縣主簿鍾乃澄。豐下汛把總李廣愛。協防朱保珍。著一併革職。兼轄之徐州道沈濂。河營參將呂邦治。淮徐遊擊闕興邦。均著革職。暫行留任。責令隨同辦工。不准置身事外。揚以增身任河督。未能先事豫防。實難辭咎。著摘去頂帶。與兼管河務之兩江總督陸建瀛。交部分別議處。另片奏沛縣被災較重。先行捐銀拯濟。並啟放外南之順清河。使湖水刷滌。河身等語。均著照所擬妥速辦理。○又諭都察院奏各省奏交案件。逾限未結。請照咨案一律知照。該衙

門。以憑催參等語。據查自道光二十一年。至二十九年。奉特旨交辦之案。尚有福建省十一件。廣東省五件。奉天省二件。山東省一件。江南省一件。直隸省一件。均屬有逾例限。似此因循成習。勢必拖累無辜。於民生大有關係。著各該督撫等。查明逾限各案。迅速審辦完結。毋得再有延宕。所有承審遲延各職名。並著咨部照例議處。嗣後奏交案件。著與咨交各案。一併將已結未結起數。咨報都察院。查覈例限催參。以清案牘。而儆廢弛。其步軍統領衙門逾限奏案。亦著歸入都察院催參案內辦理。○又諭。顏以燠奏黃河盛漲。兩岸險工。搶鑲平穩一摺。本年黃河水勢。自白露節後。逐日加長。上南蘭

儀。睢甯商虞。下北曹河等六廳。尤為險要。經該督督飭各道分投搶鑲。得免貽誤。現在南河豐北漫口。水勢橫溢。該督尤當嚴飭道廳營汛。妥慎修守。毋稍疏懈。又片奏現飭運河道。泲河廳查勘黃水漫溢處所。究於何處歸宿。是否有礙運道。著即將實在情形。迅速具奏。至被水村莊。著陳慶偕迅委妥員查明撫恤。毋令失所。○又諭御史吳廷溥奏查辦考試出結。未能覈實摺片各一件。並鈔錄科場例案呈覽。著禮部與現議卓秉恬等。並王慶雲原奏。一併秉公查覈。妥議具奏。此案現交部議。尚未覆奏。該御史係直隸籍貫。自應靜聽部議。如所議有未允協。原可據實指陳。乃於部議未定之先。率行

陳奏。殊屬非是。吳廷溥著傳旨申飭。○諭軍機大臣等。楊以增奏。勘明豐北漫口情形。並繪圖貼說呈覽。此次豐北三堡黃流漫溢。口門已塌寬一百八十餘丈。大溜全行掣動。民田廬舍。多被淹浸。所謂保障斯民者。安在耶。現在辦理堵築。需用浩繁。國家經費有常。豈能任貽誤各員。殃民糜帑。應如何分別罰賠。及設法籌款之處。著該督等迅速悉心籌畫。妥議具奏。務當激發天良。撙節覈計。毋得稍有浮糜。重干咎戾。將此諭令知之。○江南河道總督楊以增奏報豐北被災。籌辦撫恤事宜。得旨。流離失所。皆朕之德薄所致。爾若不激發天良。何顏對朕。若入奏稍有不實。是增朕之過也。稽首願

天。夫復何言。○甘肅涼州鎮總兵官萬飛鷹奏報到任日期。得旨。勉力為之。又批。勤加訓練。力戒因循。操守尤為緊要。此諭。須默識之。不可忘。○乙未。

上詣

壽康宮問

皇貴太妃安。○

孝德皇后殯宮月祭。遣官行禮。○諭內閣。工部錢法堂奏。請嚴催銅運等語。銅運為鼓鑄攸關。斷不容遲延貽誤。現在戶工兩局。銅斤短絀。疊經降旨嚴催。而該運員等行走遲滯。習為故常。若非責成地方官竭力催提。必致貽誤鼓鑄。所有已入

山東境之已酉年加運。一起彭克儁。二起趙崑。已渡黃之正運。四起吳鴻昌。庚戌年正運。一起鄭訓達。已入湖北境之一起王日省。現在何處逗遛。著沿途各督撫及藩臬大員。飛飭提催。先將已入山東境之彭克儁。趙崑。已渡黃之吳鴻昌。鄭訓達等。四起銅運。趕於九月內運送到京。以資接濟。其報入湖北境之王日省。及庚戌正運三起陳步棻。四起顧恩綬。加運一起鄒衍奉。二起彭蓋忠等。在途各運。亦著趕緊嚴催。迅速趲行。儻各該運員沿途逗遛。或地方官不能實力催趲。即著指名嚴叅懲辦。○又諭。程裔采。龔裕。奏民隄漫缺。請將搶護不力各員。交部議處一摺。湖北公安。江陵。監利。石首。四縣

民隄於本年六月初間。均有被水漫溢。致成缺口處所。該管各員。搶護不力。咎實難辭。署公安縣事試用知縣劉德紀。江陵縣知縣俞昌烈。監利縣知縣彭鳳池。代辦石首縣事石首縣縣丞黃履元。著一併交部照例議處。該督撫。即嚴飭該員等。迅將潰口搶築修復。毋稍延宕。其被水居民。據稱業經妥為安撫。仍著察看情形。據實具奏。○以挑挖運河。並催趲出力。賞山東同知吳吉昌。知州陳寬升銜。○丙申。諭內閣。奕興奏。奉天捕務。因循日久。請及時分別勸懲等語。奉天所屬復州。蓋平縣等處。盜案滋多。節經降旨。飭令該將軍將捕役。誘盜分肥各情。嚴行查辦。茲據奕興奏稱。前派蒙古驍騎校恩

合。拏獲賊犯張景堂。供認曾被復州捕役葛倫。莊青。王姓等緝獲。旋因索給錢文。私行釋放。當將該犯交熊岳防守尉衙門。派差押解。中途疏脫。又經蓋平縣拏獲。旋派役劉廣。解至遼陽城守尉衙門。加派驍騎校慶雲。幫同護解。又復逃逸。原派解役劉廣。亦攜帶解送印文潛逃。其中顯有賄縱情弊。復州捕役等。既據賊犯供稱。得受東錢至二千餘千之多。是其臨時賄縱。及平日得賄包庇情形。已可概見。若不嚴行究辦。何以懲積蠹而靖盜源。著該將軍府尹。嚴飭各該州縣。將賊犯張景堂。捕役劉廣等。緝拏務獲。並捕役葛倫。莊青。王姓等。一併嚴審。按律究辦。驍騎校慶雲。著摘去頂帶。勒限緝拏。儻

逾限無獲。即行革職。以為護解不慎者戒。蒙古驍騎校恩合。疊次查拏盜犯。設法購綫。先後緝獲要犯多名。尚屬勤奮。著賞戴藍翎。以示鼓勵。○又諭賽尚阿奏。新墟賊匪逃竄。官兵追勦情形一摺。廣西逆匪。自竄踞新墟。疊經前後兩路官兵進勦。該匪勢漸窮蹙。焚巢而竄。八月十七十八等日。我兵分路追勦。擒斬甚多。並生擒偽司馬楊繼倡。訊供偽軍師周錫能。業已殲斃。現在該匪由藤縣和平墟等處逃逸。惟巴清德。向榮等。截賊前路。乃因屢遇大雨。被匪衝撲。致有損失。李瑞。王夢麟。帶兵駐劄古城坳。經文岱等。駐鄧塘水地方。李伏管。帶楚兵。均未能遏賊奔竄之路。實難辭咎。李瑞。王夢麟。均著

摘去頂帶。仍交部嚴加議處。李伏。經文岱。均著交部嚴加議處。仍一併留於軍營。責令立功自效。巴清德。向榮。長瑞。亦著交部議處。仍著會同烏蘭泰等。合力兜勦。務將竄出各匪。併力殲擒。毋得再有疏失。致干重咎。陣亡千總楊成貴。著交部照例議卹。○諭軍機大臣等。寄諭欽差大臣大學士賽尚阿。新墟賊匪。由藤縣和平墟竄逸。此路可通永安。修仁等處。為入省要路。該大臣自應持以鎮靜。嚴飭向榮一軍。激勵士卒。與烏蘭泰等。聲勢聯絡。或前後夾擊。或設伏抄勦。總令該匪奔喘不暇。斷其搶掠之路。再此時賊匪分竄。勢已渙散。正可乘此機會。立懸重賞。設法擒縛逆首數人。則賊膽自落。其勢

更易解散。所募福勇、潮勇，即飭趕緊招募精壯者數千，以資堵截。總兵德亮等業已革職，著仍遵前旨留營效力。匪首顏品瑤是否已被殲戮，李士青等現在如何設法擒捕，均即查明具奏。該大臣務當相機妥籌，嚴密布置，毋得再有疏失。以副朕望。至軍餉已飭戶部續撥一百萬矣。將此由六百里諭令知之。○又諭前據楊以增奏，豐北三堡黃流漫溢，朕心實深焦灼。著瑞常於場事完竣後回京，路過徐州，即前往豐北一帶訪察該處漫口，是否實係無工處所，究係何員貽誤。所報口門塌寬一百八十五丈，是否屬實。現辦裹頭已否完固。其民田廬舍淹浸若干，被水居民如何安撫，沛縣一帶村莊

被災尤重。現在情形如何，饑民眾多，有無匪徒乘機搶掠，滋生事端。陸建瀛計已馳抵工所，現與楊以增如何籌畫經費，覈實辦理。至河流串入運道，於回空漕船果否無礙。以上各情節著瑞常逐一詳細查明，迅速由驛具奏，以慰朕念。楊以增先後奏到摺片，並諭旨二道，均鈔給閱看。將此諭令知之。○盛京將軍奕興奏，遵查浙江、福建等省商船，在金州、復州、錦州屬界洋面被劫勒贖，業將緝捕不力之水師營弁奏參摘頂。王以咸在牛莊界被劫，業經勒緝查參。錦州府知府並無遣人進京，中途被劫之事，已革復州知州王安業前在雲南同知任內吸食鴉片，既已戒絕，因患寒疾復借煙具，冀圖

治病尚非無故。久慣吸食。孫雲沛與馬泳德等。至事主曲泳順家行劫得財。梁洪春窩盜分贓。均經分別問擬斬決。梁洪春與何泳幅等二十六人。結拜弟兄。並無歃血訂盟情事。緝獲梁洪春時。眾鋪戶懼扳受累。措備東錢一千四百串。寄在吳學讓家。嗣經詢無其事。將錢退還。並無為梁洪春行賄。用錢萬串之事。捐職千總蔡序東。係通判劉榮桂戚誼。曾至吳學讓鋪內。致招物議。實無勾通情弊。刑書樂吉生等。亦無受賄舞弊重情。至奸民偷窺金沙。曾經酌定緝捕章程。每年春秋會哨一次。現復嚴飭臺卡各員。隨時認真稽查。報聞。○兵部左侍郎孫葆元。以親老多病。乞開缺回籍侍養。允之。○轉

兵部右侍郎趙光。為左侍郎。以署吏部左侍郎何桂清。為兵部右侍郎。戶部右侍郎翁心存。兼署吏部右侍郎。都察院左副都御史李嵩。署禮部左侍郎。○丁酉。湖北巡撫龔裕。奏遵旨查拏痞匪。及現辦緝捕情形。得旨。認真辦理。不可視為具文。○刑部尚書阿勒清阿。因病開缺。仍管正紅旗漢軍都統。○以察哈爾都統恆春。為刑部尚書。吏部尚書柏葰。署正紅旗漢軍都統。○戊戌。

上詣

壽康宮問

皇貴太妃安。○諭內閣。陸建瀛奏。鹽場猝被風潮。委員查勘大

實錄卷四十一  
概情形一摺。淮南豐利。耕茶。掘港。草堰等場。本年八月內。猝遭風雨。潮勢洶涌。將范隄。稽隄。衝缺數處。竈田廬舍。多被淹浸。埤場坍塌。滷灰漂灑。人口亦有損傷。殊堪憫惻。該督現已委員馳往查勘。有應行撫恤之區。著即先行籌款散放。勿任一夫失所。並著查明各場。何處被災較重。何處不致成災。覈實辦理。淮南甫定新章。正值秋產緊要之時。斷不可任聽該場員等藉口被災。豫為缺額地步。衝決之。范隄等工。均著勒明趕緊修復。其豐利場竈棍。藉災滋鬧一案。著即飭屬嚴拏懲辦。以戢奸宄而安善良。○諭軍機大臣等。有人奏前任湖南巡撫陸費瓌。在任時貪贓賣缺。以巡捕蔡鼎新。王逢吉為

腹心。致佐雜人員爭先進賄。知縣張宗世。俞舜欽。俞會昌。皆有賄賂情事等語。湖南吏治廢弛。總由大吏表率無方。前因程番采。奏參前任藩司萬貢珍。道員呂恩湛。已照部議革職。並諭該督查辦。若如所奏。是萬貢珍等未能整頓。未必非陸費瓌為之厲階。著程番采。按照摺內所稱。逐款訪查。如有前項劣蹟。據實具奏。毋稍徇隱。原摺著鈔給閱看。將此諭令知之。○又諭。有人奏湖南同知俞舜欽。前在江西鉛山縣任內。貪賄庇差。以練保兼催漕米。各都未完之米。勒令練保賠墊。以致該縣五十餘都。胥受其累。又私設班館。濫押無辜。非刑拷打。致斃練保。余添福等數十人之多。或捏稱病故。或抑勒

家屬出結。俱在該府衙門控告有案。又囑令書吏朱象賢等藉端詐贓。及蠹書張朱周楊等姓。說事過錢各等語。州縣為親民之官。保甲為弭盜之法。若如所奏。種種擾累貪酷。大干法紀。著陸建瀛。陸應穀。按照摺內各款。逐一訪查。其有案可據者。提省秉公訊辦。據實叅奏。毋得稍有不實不盡。原片著鈔給閱看。將此諭令知之。尋奏。俞舜欽任鉛山縣時。用練保催辦錢糧。又將監生吳兆南。勒充練保。戶書朱象賢。從中需索。實屬辦理不善。下部處分如例。○命福建按察使查文經。馳往江南。隨同兩江總督陸建瀛。辦理豐北河工。○江蘇布政使武崇。因病解任。以江蘇按察使聯英。為布政使。調福建

按察使查文經。為江蘇按察使。以江西督糧道楊培。為福建按察使。

大清文宗協天翊運執中垂謨懋德振武聖孝淵恭端仁寬敏  
顯皇帝實錄卷之四十一



